



40

40

Nasegrübler Mir tanze sit 40 Jahr durs Stedtli

Sit 40 Joor si mir a dr Laufner Fasnacht drbi,
drum sell das ä Rüggblogg über diä Zyt si.

Während eusne Recherche hei mir
eusi Gedanke lo triibe
und dörfe do die zensierti Version schriibe:

Vor 15 Joor hei mir scho s'Sujet
«ä ¼ Jahrhundert grüblet» gha,
do isch er gstorbe dr «King of Pop» Maa.
15 Joor spöter erwiise mir ihm diä Ehr
und tanze dur's Stedtli chrütz und quer.

Scho 40 Joor si mir zämme uf dr Gass
und hei ä huffe Spass.

Mit «Big Brother» hei mir vor 40 Joor gstartet,
und niemer het gwusst was eus erwartet.

Scho villi Sache si bi eus gfloge:
Posuune, Gable und Ehering im hoche Boge.

Vom Anfang isch nume no einä drbi,
euse Mägge wiä sells o angerscht si.

Sini Apéros si legendär,
am liebste blibe mir drü Däg stationär.

Am morgefrieh bim Fasnachtsilüte si mir nit drbi,
will mir chönne ebbe nie pünktlich si.

Nit emol am Umzug laufe alli mit,
will's eifach gueti Gründ drfür git.

S'Uflöse unger dr Latärnä hei mir gar nit gärn,
isch diä nöchshti Fasnacht wider so färn.

Am meiste hei mir miesse lache,
het einä welle 4 Däg Fasnacht mache.

S'Probeweekend in Altnau e riise Hit,
do mache wider alli mit.

O wenn si alli stinggä,
die si sich gärn usem Buchnabel dringgä.

Inzwüsche mache mir s'Hüttewartteam
uf dr Hohe Winge nervös,

aber worum? — Mir si doch ganz seriös.

Ohni Zahnbürstli und mit wisse Schueh,
was het denn das mit Wanderweekend z'due?

Durch's Stedtli tanze mir scho sit 40 Joor
und hei no keini graue Hoor.

Zum Glügg hei mir Nachwuchs drbi,
vo jung bis alt es dörfe gärn no meh Neui si.

D'Guggeprob am Fritig,
beände mir wider zitig.

S'Goln und s'Noon diä uf eus warte,
dass mir chönne i Usgang starte.

O mir hei eus mitere Waageclique
welle zämmeschliessä

und die jetzt mit dä Birsbettrammler
so mänge Alass gniessä.

Naserammler hei mir däm gseit,
het a däm Obe nit jedä s'Bier vertreit.

I dr ehemalige Bibliothek vo Laufe,
cha me jetz Ricolabummeli chaufe.

Im oberä Stogg cha me wohne,
fürä Vrmieter duet sich das sicher lohne.

D'Rosegartewaggis chömme in Fahrt,
und si das Joor a dr Fasnacht o am Start.

Mir finge das e super Idee
und freue eus si am Mittwuchmorge

im Inline z'gseh.

Mir Grübler si no voll im Schuss,
drum isch bi eus no lang nit Schluss.

Will eus d'Fasnacht so vill Spass macht,
zeige mir eus witerhin i voller Pracht.

D'Augering chönnte mir überschminggä,
dä Ufwand würd eus aber stinggä.

Drum si mir eifach wie mir si
und eso si mir witerhin drbi!

Mir suechä Neumitglieder, bi Inträsse bitte mäldä:

nasegruebler@gmail.com